



Nawr Yr Arwr, Marc Rees. Artist: Eddie Ladd  
(llun: Warren Orchard)

## Grantiau'r Celfyddydau i Unigolion Creadigol Proffesiynol

# Cychwyn Arni

Rhagfyr 2018





Mae Cyngor Celfyddydau Cymru yn ymrwymedig i ddarparu gwybodaeth mewn print bras, Braille, ar dâp sain ac ar ffurf Iaith Arwyddion Prydain. Byddwn yn ceisio darparu gwybodaeth mewn ieithoedd ar wahân i'r Gymraeg a'r Saesneg ar gais.

Mae Cyngor Celfyddydau Cymru yn gweithredu polisi cyfle cyfartal.

## Cynnwys

<b>Croeso</b>	02
<b>Cyflwyniad</b>	02
Yma i Helpu	03
Fformatau Amgen a Hygyrch	03
Y Galw am Gyllid	03
<b>Yr awydd i wneud gwahaniaeth</b>	03
Cynorthwyo unigolion creadigol proffesiynol	04
Beth rydyn ni'n chwilio amdano	04
<b>Pwy gaiff wneud cais</b>	06
<b>Beth y gallwn ei ariannu</b>	07
<b>Beth y gallwch wneud cais amdano</b>	09
Gweithio'n Rhyngwladol	09
<b>Y Cyllid sydd ar Gael</b>	11
Grantiau Bach	11
Grantiau Mawr	11
Cyllid Partneriaeth	11
Costau hygyrchedd	11
<b>Pa mor aml y cewch wneud cais</b>	12
<b>Pryd i gyflwyno'ch cais</b>	12
<b>Y camau nesaf</b>	13
Manylion cyswllt	13
<b>Yn wahanol i'ch disgwyliadau?</b>	14
Cefnogaeth arall	14



Mae'r holl ddogfen hon wedi'i hyperddolennu. Wrth glicio ar y penawdau ar y tudalen cynnwys, eir â chi'n syth i'r adran berthnasol. Cliciwch i ddychwelyd i'r tudalen cynnwys.

# Cychwyn Arni

## Croeso

Ni yw'r corff cyhoeddus sy'n gyfrifol am ariannu a datblygu'r celfyddydau yng Nghymru. Ein gweledigaeth yw creu Cymru greadigol lle mae'r celfyddydau wrth galon bywyd a lles y genedl.

Un o'r dulliau rydyn ni'n eu defnyddio i geisio gwneud hyn yw dosbarthu cyllid, ac mae'r cynllun hwn yn darparu cyllid ar gyfer pobl greadigol broffesiynol. Y Loteri Genedlaethol sy'n ariannu'r grantiau.

Mae cynorthwyo unigolion creadigol proffesiynol yn flaenoriaeth bwysig i ni. Rydyn ni'n awyddus i adnabod a meithrin unigolion â dawn greadigol, ac rydyn ni am alluogi unigolion creadigol proffesiynol i ddatblygu eu gyrfaedd a bod yn gallu ennill bywoliaeth gynaliadwy yng Nghymru trwy eu gwaith.

Mae'r cynllun hwn yn bwysig i ni am ei fod yn galluogi unigolion creadigol proffesiynol i wireddu eu potensial artistig trwy gefnogi prosiectau sy'n herio arferion ac yn datblygu gyrfaedd artistig. Rydyn ni'n uchelgeisiol dros y celfyddydau yng Nghymru, ac rydyn ni am i'r cynllun gefnogi gwaith o safon. Rydyn ni am fuddsoddi mewn prosiectau sy'n cynrychioli'r gorau o'r celfyddydau yng Nghymru.

Y blaenoriaethau a bennir yn *Ysbrydoli: Ein Strategaeth ar gyfer Creadigrwydd a'r Celfyddydau* sy'n arwain ein penderfyniadau ariannu. Mater o uchelgais greadigol a dychymyg yw hi; yr angen am i'r celfyddydau ymgysylltu a chysylltu pobl; a'r sgiliau sydd eu hangen er mwyn sicrhau bod effaith y celfyddydau'n cael eu hadnewyddu a'u bod yn para.

**Bydd ein rhaglen Grantiau Bach yn cau dros-dro tra ein bod yn adolygu sut yr ydym yn dosbarthu arian Loteri. Y dyddiad olaf byddwn yn derbyn ceisiadau Grantiau Bach fydd Dydd Mercher, 10<sup>fed</sup> o Orffennaf 2019 am 5pm. Caiff benderfyniadau eu cyfathrebu erbyn Dydd Mercher 31<sup>ain</sup> o Orffennaf 2019.**

## Cyflwyniad

Mae'r ddogfen hon yn cynnwys yr holl wybodaeth sydd ei hangen arnoch os ydych chi'n ystyried cyflwyno cais ar gyfer *Grantiau'r Celfyddydau i Unigolion Creadigol Proffesiynol*. Bydd yn eich helpu chi gyda'r cam pwysig cyntaf: sef canfod a yw ein cyllid yn iawn i chi a'ch prosiect. Bydd yn dweud wrthyich pa fathau o weithgarwch rydyn ni am eu cefnogi. Rydyn ni'n galw'r rhain yn "feysydd". Mae canllawiau penodol ar gael ar gyfer pob maes, a byddwn ni'n dweud wrthyich sut i ddod o hyd i'r rhain yn nes ymlaen.

Trwy gydol y canllawiau hyn, rydyn ni'n sôn am "eich prosiect". Rydyn ni'n defnyddio'r ymadrodd hwn i ddisgrifio'r gweithgaredd rydych chi'n cyflwyno'ch cais mewn perthynas ag ef. Mae'n bwysig deall ein bod ni'n disgwyl i brosiect fod yn weithgaredd sy'n gallu cael ei ddisgrifio'n glir ac yn gryno. Rhaid i chi fod â phwrpas penodol mewn golwg, a rhaid i chi fod yn gallu esbonio'r canlyniadau (neu'r amcanion) rydych chi'n gobeithio eu cyflawni. **Rhaid i'ch prosiect fod yn gyfyngedig o ran amser (yn hytrach nag yn un parhaus), a bod yn ychwanegol at (neu'r tu hwnt i) yr hyn rydych chi'n ei wneud fel rheol.** Ni allwn gefnogi rhai mathau o weithgareddau. Byddwn ni'n esbonio rhagor y rhain yn nes ymlaen.

## Yma i Helpu

Rydyn ni am i wneud cais am *Grantiau'r Celfyddydau i Unigolion Creadigol Proffesiynol* fod mor syml â phosibl. Mae digonedd o wybodaeth ar gael i'ch helpu chi i wneud cais, ond byddwn ni'n eich cyfeirio at hyn ar wahanol gamau yn y broses pan fo angen.

Rydyn ni yn cynhyrchu Nodiadau Cymorth sy'n eich tywys chi drwy'r broses o lenwi'ch ffurflen gais. Dyna pam nad ydym wedi cynnwys gwybodaeth o'r math yma yn y fan hyn.

## Fformatau Amgen a Hygyrch

Weithiau, mae yna resymau penodol pam fod pobl yn ei chael hi'n anodd gwneud cais am grant neu gyrchu ein gwasanaethau. Os ydych chi'n dod ar draws unrhyw rwystrau gyda'n proses o wneud cais, neu'n rhagweld unrhyw rwystrau o'r fath, os oes arnoch angen cymorth i wneud cais neu i gyrchu ein gwasanaethau a'n gwybodaeth, cysylltwch â'r Tîm Grantiau a Gwybodaeth.

## Y Galw am Gyllid

Mae nifer fawr o bobl yn gwneud cais am gyllid trwy *Grantiau'r Celfyddydau i Unigolion Creadigol Proffesiynol*, ac yn anffodus, mae llawer o geisiadau da'n dod i law nad oes modd i ni eu cefnogi am nad oes digon o arian ar gael. Rydyn ni'n gwneud ein penderfyniadau'n seiliedig ar y wybodaeth yr ydych chi'n ei darparu yn eich cais, yn ogystal â'n blaenoriaethau strategol, ein gwybodaeth am eich sefydliad a'ch gweithgareddau blaenorol. Ac rydyn ni'n defnyddio ein barn broffesiynol i wneud y dewisiadau anodd am y prosiectau lu sy'n ceisio cyllid. Rydyn ni'n ymdrechu i ariannu'r ceisiadau sy'n cyflwyno'r achos mwyaf darbwyllog i gael cyllid bob tro.

Cewch ddarllen rhagor am ein blaenoriaethau strategol yn yr adran nesaf.

Ni allwn gefnogi pob dim, felly wrth gynllunio'ch prosiect, dylech feddwl beth y byddech chi'n ei wneud pe bai'ch cynllun yn aflwyddiannus, neu pe baech chi'n cael llai o arian na'r disgwyl.

## Yr awydd i wneud gwahaniaeth

Rydyn ni am i'n buddsoddiad wneud gwahaniaeth. Felly rhaid i'r holl gyllid rydyn ni'n ei ddsbarthu ein helpu ni i gyflawni'n blaenoriaethau strategol. Mae'r blaenoriaethau hyn yn ein helpu ni i gefnogi prosiectau o'r **safon uchaf bosibl**, gan sicrhau bod ein cyllid yn cael yr **effaith ehangaf bosibl** a bod y **nifer fwyaf bosibl o bobl yn manteisio arno**.

Mae ffocws ein strategaeth ar gyfer Creadigrwydd a'r Celfyddydau yng Nghymru, o'r enw *Ysbrydoli* yn syml: **creu, estyn, cynnal**. Mae hynny am fod creu celfyddyd, sicrhau ei fod yn estyn allan at bobl a'i fod yn cael effaith barhaus yn hanfodol i'n gweledigaeth ar gyfer y celfyddydau yng Nghymru.

Mae diddordeb gennym yn y ffordd rydych chi'n ymateb i hyn yn eich cais.

Mae ein strategaeth yn nodi nifer o sialensiau creadigol. Mae'r rhain yn cynnwys:

- sut rydyn ni'n annog rhagor o bobl yng Nghymru i ddewis ymgysylltu â'r celfyddydau
- sut rydyn ni'n defnyddio'r technolegau digidol mewn ffordd arloesol a dychmygus
- sut rydyn ni'n datblygu creadigrwydd plant a phobl ifanc
- sut rydyn ni'n cysylltu celfyddydau a diwylliant Cymru â llwyfannau rhyngwladol, a
- sut rydyn ni'n plannu egwyddorion datblygu cynaliadwy wrth galon ein harferion creadigol a busnes.

Gallwch gael rhagor o wybodaeth am ein Strategaeth *Ysbrydoli* trwy glicio [yma](#).

## Cynorthwyo unigolion creadigol proffesiynol

Mae ein strategaeth yn gosod mwy o bwyslais ar ein cefnogaeth i unigolion creadigol proffesiynol sydd naill ai wedi profi eu bod yn gallu cyflawni, neu wedi dangos eu potensial i gyflawni, gwaith eithriadol.

Ein nod yw meithrin amgylchedd cefnogol lle gallwch greu'r gwaith gorau posibl, ac rydyn ni am eich cynorthwyo chi ar adegau allweddol yn eich gyrfa. Ein gobaith yw y bydd darparu'r cymorth hwn yn golygu y byddwn ni'n fwy llwyddiannus wrth gadw dawn greadigol yng Nghymru.

Mae'n bwysig i ni eich bod chi'n gallu ennill bywoliaeth gynaliadwy trwy'ch arferion, a meithrin gyrfa yng Nghymru. I wireddu hyn, rydyn ni am gefnogi prosiectau sy'n cryfhau cynaladwyedd eich arferion, a hynny efallai trwy eich helpu chi i amrywio i farchnadoedd newydd, neu ffeindio ffyrdd eraill o greu incwm.

Ac wrth gwrs, rydyn ni am eich cynorthwyo chi i greu gwaith. Rydyn ni'n angerddol ynghylch buddsoddi mewn gwaith sy'n cyffroi ac yn ysbrydoli, sy'n estyn allan at gynulleidfaoedd newydd, sy'n ffrwyth cydweithredu newydd ac arloesol ac sy'n cael ei ddatblygu gan, a'i gyflawni trwy bartneriaethau creadigol.

Felly rydyn ni am fuddsoddi ynoch chi, ein hunigolion creadigol proffesiynol. Rydyn ni am fuddsoddi yn eich dychymyg.

## Beth rydyn ni'n chwilio amdano

Ein dull newydd o gynllunio'n strategol yw *Ysbrydoli*. Nid yw'n gyfarwyddol, ond yn hytrach, rydyn ni am iddo'ch helpu chi i feddwl am y darlun ehangach o ran y materion sy'n effeithio ar y celfyddydau yng Nghymru a sut y gall eich prosiect wneud gwahaniaeth yn hyn o beth.

Gallai dweud wrthym ni sut y bydd eich prosiect yn cyfrannu at ein sialensiau creadigol ychwanegu gwerth at eich cynnig, a gallai wahanu eich cais oddi wrth y gweddill. Mae hyn am fod i ba raddau rydych chi'n mynd i'r afael â'n sialensiau creadigol yn un o'r ffactorau sy'n effeithio ar ein penderfyniad.

Mewn geiriau eraill, mae prosiect sy'n mynd i'r afael ag o leiaf un o'n sialensiau mewn ffordd briodol ac effeithiol yn fwy tebygol o gael ei ariannu, neu ei flaenoriaethu, dros brosiect nad yw'n mynd i'r afael ag unrhyw un o'r sialensiau, neu brosiect sy'n gwneud hynny mewn dull llai argyhoeddiadol.

Mae yna rai egwyddorion sydd mor hanfodol i ni ein bod ni'n disgwyl i bob cais am *Grantiau'r Celfyddydau i Unigolion Creadigol Proffesiynol* eu cymryd i ystyriaeth:

- Gwlad **ddwyieithog** yw Cymru ac rydyn ni'n disgwyl i bobl allu ymgysylltu â'r celfyddydau yn iaith eu dewis, boed fel cynulleidfa, fel cyfranogwyr neu fel artistiaid. Rydyn ni'n disgwyl i chi gyfleu hyn mewn ffordd briodol yn eich cais.
- Rydyn ni am i'r celfyddydau yng Nghymru fod yn fwy **cynhwysol** ac iddynt **ymgysylltu** pobl, felly rydyn ni am i'r Unigolion Creadigol Proffesiynol rydyn ni'n eu hariannu blannu **egwyddorion cydraddoldeb ac amrywiaeth** wrth galon pob rhan o'u gwaith. Dywedwch wrthym sut y bydd eich prosiect yn mynd i'r afael â'r rhwystrau i ymgysylltu ac **estyn allan at y gynulleidfa ehangaf bosibl**.
- Rydyn ni am fuddsoddi mewn gwaith sy'n **cyffroi ac yn ysbrydoli** pobl. Byddwn ni am gefnogi'r prosiectau hynny sy'n dangos y **gorau o fyd y celfyddydau** - y nodweddion hynny a fydd yn gosod eich gwaith ar wahân fel gwaith unigryw, perthnasol, darbwyllo a pharhaus. Gwnewch yn siŵr bod eich cais yn dangos sut mae eich prosiect yn sefyll ar wahân i'r lleill.



## Pwy gaiff wneud cais

Dim ond unigolion creadigol proffesiynol gaiff gyflwyno cais o dan y cynllun hwn. Trwy hyn, rydyn ni'n golygu unigolion sy'n gweithio ar lefel broffesiynol ym maes y celfyddydau yng Nghymru. Mae hyn yn cynnwys curaduron a chynhyrchwyr, ac unigolion sy'n eu diffinio eu hunain fel artistiaid ar draws yr holl fathau o gelfyddyd.

Dyma'r **gofynion cymhwyster** y bydd angen i chi eu hystyried cyn gofyn am ffurflen gais. I wneud cais:

- Rhaid i chi fod dros **18 oed ac yn byw yng Nghymru**.
- Rhaid bod yn **gweithio ar lefel broffesiynol yn y celfyddydau yng Nghymru**. Dylai eich gwaith ddigwydd yn bennaf yng Nghymru hefyd
- Rhaid i chi **beidio â bod mewn addysg amser-llawn** mewn ysgol, coleg neu brifysgol.
- Rhaid i chi allu **darparu tystiolaeth o'ch profiad** o greu neu hwyluso gwaith artistig i'w gyflwyno i gynulleidfaoedd.
- Rhaid i chi allu dangos i ni fod gennych **ymwybyddiaeth a dealltwriaeth am Gyfleoedd Cyfartal** a'ch bod chi'n dangos cydraddoldeb ac amrywiaeth yn eich arferion. Gallwn ofyn i chi ddarparu esiamplau o sut rydych chi'n gwneud hyn.
- Rhaid cael **cyfrif banc yn eich enw eich hun**. Ni allwn dderbyn cyfrifon cymdeithas adeiladu sy'n gweithredu gyda llyfr pas yn unig.

Rydyn ni'n gwybod ei bod hi'n gallu bod yn anodd dangos **tystiolaeth o yrfa lwyddiannus**. Gallai fod yn ddefnyddiol meddwl am **orchestion eich gyrfa** hyd yn hyn, a sut a phryd y mae eich gwaith wedi cael **ardystiad y sector rydych chi'n gweithio ynddo**. Gallai hynny fod gan Unigolion Creadigol Proffesiynol eraill a sefydliadau'r celfyddydau hefyd.

Wrth ystyried eich gyrfa, byddwn ni'n edrych ar eich **profiad hyd yn hyn**, ac yn ystyried a yw'r prosiect rydych chi am i ni ei gefnogi'n cyd-fynd â hyn. Felly byddwn ni'n edrych ar **faint** eich prosiect arfaethedig, fel y **partneriaid a'r mentoriaid** o dan sylw, ac a ydych chi ar y **cyfnod iawn yn eich gyrfa** i fod yn cychwyn prosiect fel hyn. Nid mater o hyd eich CV yw hyn o reidrwydd. Mae diddordeb gennym yn eich **siwrnai greadigol** a sut y bydd y prosiect hwn yn eich helpu i gyrraedd eich nod.

Ni chewch wneud cais am gyllid os ydych wedi mynd yn groes i unrhyw gyfundeb ariannol gyda Chyngor Celfyddydau Cymru.

Gallwch gael gwybod rhagor am gyflwyno prawf o'ch cyfrif banc yn ein [Ffeithlen: uwchlwytho tystiolaeth am eich cyfrif banc](#).



Nid yw'r rhestr yn un derfynol, ac os arhoswch yn ansicr a ydych yn gymwys, cysylltwch â'n tîm gwybodaeth a grantiau.

## Beth y gallwn ei ariannu

Rydyn ni am ariannu gweithgarwch sy'n **dangos manteision clir, boed hynny i'ch gyrfa artistig, i'r sector celfyddydol ehangach neu i'r cyhoedd yng Nghymru**. Ni fyddwn yn ariannu gweithgarwch sydd â manteision masnachol yn unig.

Er mwyn gwneud cais am gyllid, rhaid i chi ddangos i ni fod eich prosiect yn diwallu rhai gofynion penodol. Disgrifir y rhain isod. Byddwn ni'n gofyn i chi gadarnhau eich bod chi'n bodloni'r gofynion hyn wrth i chi gychwyn o broses o gyflwyno cais ar-lein.

<b>Rhaid i'ch prosiect fod yn ychwanegol at eich rhaglen weithgarwch arferol</b>	<ul style="list-style-type: none"><li>Mae hyn yn golygu ei bod yn mynd y tu hwnt i'r hyn rydych chi'n ei wneud fel rheol</li></ul>
<b>Rhaid bod cyfyngiad o ran amser ar eich prosiect</b>	<ul style="list-style-type: none"><li>Mae hyn yn golygu ei bod yn weithgaredd cynlluniedig â dyddiad dechrau a gorffen penodol</li></ul>
<b>Rhaid i'ch project fod â dyddiad dechrau sy'n eich galluogi i gynllunio'ch prosiect yn drylwyr</b>	<ul style="list-style-type: none"><li>Mae hyn yn golygu eich bod chi wedi ymgorffori digon o amser cynllunio i baratoi'n drylwyr ar gyfer eich prosiect os cewch chi'r cyllid</li></ul>
<b>Rhaid i chi fod â chyllid partneriaeth ar gyfer eich prosiect (a elwir hefyd yn gyllid cyfatebol)</b>	<ul style="list-style-type: none"><li>Mae hyn yn golygu'r cyllid arall fydd ei hangen arnoch er mwyn i chi gyflawni'ch prosiect. Disgwyliwn i o leiaf <b>10%</b> o gost gymwys eich prosiect ddod o ffynhonnell arall ac nid oddi wrth Gyngor Celfyddydau Cymru</li></ul>

Nod *Grantiau celfyddydol i broffesiynolion creadigol* yw ariannu amrywiaeth eang o weithgarwch, ond mae rhai pethau na allwn eu hariannu.

### Ni allwn ariannu:

- gweithgareddau nad ydynt yn gysylltiedig â'r celfyddydau
- gwobrau, nwyddau, arlwyfaeth, rhoddion, tân gwyllt, digwyddiadau cystadleuol a digwyddiadau sy'n unswydd at ddibenion hyrwyddo
- costau ôl-weithredol. Hynny yw, costau gweithgarwch sydd wedi digwydd eisoes, neu unrhyw gostau rydych chi wedi eu talu neu wedi cytuno i'w talu (trwy lofnodi contract neu osod archeb er enghraifft), cyn i ni wneud penderfyniad ar eich cais, a chyn i chi

dderbyn ein cynnig grant. Byddwch yn cyflawni unrhyw weithgareddau i hysbysebu neu hyrwyddo eich prosiect cyn y pwynt yma'n llwyr ar eich risg eich hun. Ni allwn ariannu prosiectau lle mae tocynnau eisoes ar werth. Ni allwn ariannu prosiectau lle mae tocynnau eisoes ar werth.

- pobl greadigol broffesiynol i arwain **prosiectau cyfranogi**, megis gweithdai neu i weithio gyda phlant, pobl ifanc neu oedolion bregus. Byddem yn disgwyl i gorff sefydledig â threfniadau diogelu priodol wneud cais am gyllid yn yr achosion hyn.





Yn ogystal, nid yw *Grantiau'r Celfyddydau ar gyfer Pobl Greadigol Broffesiynol* yn **darparu cyllid addysgol**. Felly nid ydym ni'n ariannu cyrsiau rhan amser na llawn amser ar gyfer israddedigion nac ôl-raddedigion mewn sefydliadau addysg bellach nac uwch. Nid ydym yn ariannu tiwtora, gwersi na hyfforddiant galwedigaethol chwaith.

[Yn ôl i'r tudalen Cynnwys](#)

## Beth y gallwch wneud cais amdano

Rydyn ni'n galw'r mathau o weithgarwch rydyn ni am eu cynorthwyo yn "feysydd". Rydyn ni'n glir iawn ynghylch beth rydyn ni am ei gyflawni ym mhob maes, a sut mae'r meysydd yn ein helpu ni i gyflawni ein blaenoriaethau strategol:

Dyma'r meysydd:

Maes	Pwrpas
 <a href="#">Datblygu'r Diwydiant Cerddoriaeth</a>	Cynorthwyo prosiectau sy'n datblygu sylfeini diwydiant cerddoriaeth llewyrchus yng Nghymru, ac sy'n helpu pobl â dawn gerddorol yng Nghymru i feithrin gyrfaeodd cynaliadwy
 <a href="#">Cynhyrchu</a>	Cynorthwyo'r broses o greu gwaith artistig o safon uchel i'w gyflwyno i gynulleidfaoedd
 <a href="#">Ymchwil a Datblygu</a>	Cefnogi cydweithio er mwyn archwilio a datblygu syniadau newydd a ffyrdd newydd o weithio.
 <a href="#">Datblygiad Proffesiynol</a>	Galluogi pobl greadigol broffesiynol i fynychu hyfforddiant, cyfoethogi eu harferion creadigol a buddsoddi yn y sgiliau a fydd yn eu cynorthwyo i feithrin gyrfaeodd cynaliadwy yng Nghymru

Mae gennym nodiadau canllaw ar wahân ar gyfer pob maes. Mae'r rhain yn cynnig gwybodaeth bellach am y mathau o brosiectau rydyn ni am eu cynorthwyo a sut i fynd ati i wneud cais.

## Gweithio'n Rhyngwladol

Rydyn ni'n cefnogi gwaith rhyngwladol mewn dwy ffordd: trwy ddod â gwaith o dramor i Gymru, a thrwy ddarparu cyfle i sefydliadau'r celfyddydau ac unigolion creadigol proffesiynol weithio ar lwyfan ryngwladol (hynny yw, y tu hwnt i'r DU).

Mae hi'n bwysig ein bod ni'n cysylltu diwylliant Cymru â'r byd mewn ffyrdd a fydd yn effeithio mewn ffordd weladwy ac a fydd â gwerth parhaus. Am hynny gallwn gynorthwyo gweithgarwch rhyngwladol sy'n digwydd yng Nghymru trwy *Grantiau'r Celfyddydau i Unigolion Creadigol Proffesiynol*. Gall y gweithgarwch gynnwys rhaglennu gwaith gan artistiaid rhyngwladol o safon, cydweithredu a meithrin partneriaethau artistig, cyfnewidfeydd preswyl, rhannu arferion da a datblygu sgiliau.

Mae ein Cronfa Cyfleoedd Rhyngwladol (CCRh) yn cefnogi gweithgarwch sy'n cael ei gyflawni y tu hwnt i'r DU yn benodol. Celfyddydau Rhyngwladol Cymru (CRhC), sef cangen ryngwladol Cyngor y Celfyddydau, sy'n gweinyddu'r gronfa, a chewch ddarllen rhagor amdani [yma](#).

[Yn ôl i'r tudalen Cynnwys](#)

## Y Cyllid sydd ar Gael

Mae dwy lefel o gyllid ar gael: grantiau bach a grantiau mawr.

### Grantiau Bach

Mae ein cynllun grantiau bach yn darparu grantiau gwerth rhwng £250 a £5,000 (neu i fyny at £3,000 ar gyfer prosiectau ymchwil a datblygu).

**Os ydych chi'n cyflwyno'ch cais cyntaf i ni, yna rhaid i chi wneud cais ar y lefel hon.** Mae hyn fel y gallwn ni feithrin ein gwybodaeth am eich gwaith a gweld eich bod chi'n gallu rheoli cyllid cyhoeddus yn effeithiol.

### Grantiau Mawr

Mae grantiau mawr ar gael i Unigolion Creadigol Proffesiynol sy'n cyflwyno cais yn y maes Cynhyrchu.

Mae'r grantiau hyn yn darparu grantiau gwerth rhwng £5,001 a £25,000 (neu £30,000 o dan amgylchiadau eithriadol ac os yw'ch prosiect ar gyfer prosiect cynhyrchu rhyngwladol).

Rydyn ni'n cynnig rhagor o wybodaeth i chi am ofynion penodol y grant hwn yn y wybodaeth fwy manwl rydyn ni'n ei darparu ar gyfer y maes [Cynhyrchu](#).

### Cyllid Partneriaeth

Y mwyafswm allwn ni ariannu yw **90% o gyfanswm costau cymwys eich prosiect**. Byddwn ni'n darparu rhagor o wybodaeth am y costau cymwys yn ddiweddarach yn y broses o wneud cais.

Cofiwch na allwn ystyried talu symiau sy'n uwch na hyn. Mewn llawer o achosion, mae'n debygol y bydd ein cyfraniad yn sylweddol lai.

Byddwn ni'n disgwyl i chi geisio mwyafu'r cyfraniadau at eich prosiect o'ch cronfeydd eich hun a thrwy gyllid gan bartneriaid ariannu eraill.

Rydyn ni am weld sut byddwch chi'n defnyddio ein cyfraniad i ddiogelu cyllid o ffynonellau eraill. Bydd hyn yn dangos eich ymroddiad i'ch prosiect. Bydd yn dangos hefyd bod budd-ddeiliaid eraill yn cytuno bod eich prosiect yn bodloni angen ac y bydd yn cynnig budd i'r cyhoedd.

### Costau Hygyrchedd

Os ydych chi'n anabl, cewch wneud cais am gyllid tuag at y costau hygyrchedd y byddwch chi'n eu tynnu wrth gyflawni'ch prosiect. Caiff y costau hyn eu hystyried yn ogystal â

chostau'r prosiect artistig, a byddwn ni'n ystyried caniatáu i'ch cais fynd y tu hwnt i'r uchafswm.

## Pa mor aml y cewch wneud cais

Rydyn ni am sicrhau bod ein cyllid ar gael mor eang â phosibl, felly mae yna gyfyngiad ar sawl gwaith y gallwch gael cyllid trwy *Grantiau'r Celfyddydau i Unigolion Creadigol Proffesiynol*.

**Cewch ddal un grant o'r cynllun hwn mewn unrhyw gyfnod o ddeuddeg mis.** Defnyddiwn ddyddiad dechrau eich prosiect i gyfrif y cyfnod o ddeuddeg mis.

Yr unig bryd y byddwn yn llacio'r rheol yma yw os ydych yn ceisio am arian ar gyfer gwaith datblygu, lle ystyriwn **un** grant ychwanegol y flwyddyn ar gyfer y pedwar maes canlynol:

- Ymchwil a Datblygu
- Datblygiad Proffesiynol

Er enghraifft, gall eich sefydliad dderbyn grant o'r meysydd Cynhyrchu ac Ymchwil a Datblygu mewn un blwyddyn, ond ddim am ddau brosiect Ymchwil a Datblygu.

Nid yw'r ffaith y cewch gyflwyno ail gais mewn unrhyw gyfnod o ddeuddeg mis yn gwarantu llwyddiant y cais.

## Pryd i gyflwyno'ch cais

Nid oes dyddiadau cau ar gyfer grantiau bach, ond mae angen caniatáu **o leiaf chwech wythnos gwaith** rhwng dyddiad cyflwyno'r cais a dyddiad dechrau eich prosiect. Mae hyn er mwyn ein galluogi ni i asesu eich cais yn drylwyr.

Caiff eich cais ei ystyried yn y cyfarfod penderfynu nesaf sydd ar gael. Os yw'r cais yn llwyddiannus, cewch gychwyn eich prosiect fel rheol ar ôl i ni anfon llythyr cynnig grant atoch a phan fyddwch wedi llofnodi a dychwelyd y ffurflen i dderbyn y grant

**Bydd ein rhaglen Grantiau Bach yn cau dros-dro tra ein bod yn adolygu sut yr ydym yn dosbarthu arian Loteri.** Y dyddiad olaf byddwn yn derbyn ceisiadau Grantiau Bach fydd Dydd Mercher, 10<sup>fed</sup> o Orffennaf 2019 am 5pm. Caiff benderfyniadau eu cyfathrebu erbyn Dydd Mercher 31<sup>ain</sup> o Orffennaf 2019.

Fel arfer, mae **pedwar dyddiad cau** y flwyddyn am geisiadau am **grantiau mawr**. Rydyn ni'n cyhoeddi'r dyddiadau hyn ar ein gwefan ac yn y dogfennau maes, a byddwn yn derbyn ceisiadau hyd at 5.00pm ar y dyddiad cau. Bydd angen i chi ganiatáu o leiaf naw wythnos gwaith rhwng y dyddiad cau a dyddiad cychwyn eich prosiect.

Os yw'r cais yn llwyddiannus, cewch gychwyn eich prosiect fel rheol ar ôl i ni anfon llythyr cynnig grant atoch, pan fyddwch wedi llofnodi a dychwelyd ffurflen dderbyn y grant a'ch bod wedi bodloni unrhyw amodau rydyn ni wedi eu gosod ar eich grant.

[Yn ôl i'r tudalen Cynnwys](#)

## Y camau nesaf

Rhaid ichi drafod eich prosiect gyda Swyddog Datblygu cyn inni anfon ffurflen gais atoch.

Os oes gennych brosiect y credwch y gallai fod yn gymwys, e-bostiwch eich syniadau prosiect i: [datblygu@celf.cymru](mailto:datblygu@celf.cymru)

Yn eich e-bost dylech gynnwys y wybodaeth ganlynol:

- eich enw
- teitl y prosiect
- disgrifiad o'ch prosiect
- y maes ariannu rydych yn meddwl ceisio ato
- faint o arian sydd angen arnoch chi?
- lleoliad y prosiect

Hoffem eich annog i ddarllen yn drylwyr y [wybodaeth am y maes](#) y mae eich prosiect yn gweddu iddo, cyn cysylltu â ni.

Os nad ydych yn sicr a ydych yn gymwys, os oes cwestiwn technegol gennych am y broses ymgeisio neu os ydych am gael gwybodaeth am ein gwahanol gynlluniau ariannu, cysylltwch â [grantiau@celf.cymru](mailto:grantiau@celf.cymru)

## Ffyrdd eraill i gysylltu efo ni:

Ffôn: 0845 8734 900 (Rhaid talu cyfraddau lleol a gall cyfraddau ffôn symudol amrywio)  
029 2044 1300

9.00 - 5.00 Llun - Iau

9.00 - 4.30 Gwener

Twitter: [@Celf\\_Cymru](#)

Gwefan: [celf.cymru](http://celf.cymru)

Gallwch ddod o hyd i ragor o wybodaeth am sut i gysylltu â ni yma: [cysylltwch â ni](#)

[Yn ôl i'r tudalen Cynnwys](#)



## Yn wahanol i'ch disgwyliadau?

Hwyrach nad oeddech chi'n gwybod bod *Grantiau'r Celfyddydau i Unigolion Creadigol Proffesiynol* yn cael eu hariannu gan y Loteri Genedlaethol. Os na allwch dderbyn cyllid y loteri am resymau crefyddol, dylech gynnwys llythyr gyda'ch cais i esbonio pam. Os yw eich cais yn llwyddiannus, byddwn ni'n ceisio ariannu eich prosiect o gyllid o ffynonellau eraill. Dylid nodi bod y cyllid hwn yn gyfyngedig iawn, felly ni allwn warantu y bydd modd gwneud hyn.

### Cefnogaeth arall

Un yn unig o'n dulliau o ddarparu cymorth ar gyfer unigolion creadigol proffesiynol yw *Grantiau'r Celfyddydau i Unigolion Creadigol Proffesiynol*. Dyma rai o' ffyrdd eraill y gallwn gefnogi unigolion creadigol

- **Gwobr Goffa Brian Ross**  
Oherwydd cymynrodd hael, gallwn gynnig grant bob blwyddyn i ddau fyfyrwr gradd eithriadol ym maes celf gain sy'n graddio o brifysgolion Cymru.
- **Gwobr Goffa Eirian Llwyd**  
Oherwydd cymynrodd hael, gallwn gynnig grant bob blwyddyn i un artist newydd sy'n codi i'r brig ac sy'n arbenigo mewn gwneud printiau.

Am fwy o wybodaeth, ewch i [www.celf.cymru/ariannu](http://www.celf.cymru/ariannu) neu ebostiwch [datblygu@celf.cymru](mailto:datblygu@celf.cymru)

### Ffilm Cymru

Nod yr asiantaeth yw datblygu sector ffilm Cymru a mwyafu buddion economaidd, addysgiadol a diwylliannol ffilm. Darllenwch ragor [yma](#).

### Llenyddiaeth Cymru

Ei nod yw datblygu a chefnogi awduron ar bob cam o'u taith ysgrifennu i gyrraedd eu potensial llawn. Am ragor o wybodaeth am ei gwasanaethau – bwrsariaethau i awduron, mentora a gwasanaeth beirniadol - ewch i'w gwefan drwy glicio [yma](#).

[Yn ôl i'r tudalen Cynnwys](#)